

OPINEDDU – disney

Sta stòria nostra inghitzat asuta de unu celu de steddus luxentis che diamantis. Su Grillu chi chistionat fiat arribbau in sa bidda candu totus fiant drommius e is bias fiant a su scuru e silentziosas. Ddoi aiat una luxi sceti, chi beniat de sa domu de Gepetu, unu maistu de linna beciteddu. Su Grillu, fadiau e mortu de frius, si fiat acostau cun sàrtidus mancus, a sa fantanaanca ddoi aiat luxi, circhendi unu cuebi.

Su Grillu, cun unu sàrtidu mannu mannu, fiat aterrau asuba de su setzidroxu de sa fentana e iat castiau in s'imbirdu. In s'aposentu non ddoi aiat nemus, ma su fogu in sa ziminera fiat allutu. A s'acabu si fiat fatu coràgiu e fiat intrau curri curri a si callentai acanta de su fogu. In su mentris si castiàt a ingiru: s'aposentu fiat prenu de giogus, arrollògius e scatuleddas musicalis. Fiat unu logu màgicu!

Totuinduna su Grillu chi chistionat si fiat acatau de unu puponi de linna, unu de cussus chi si movint cun is filus. Fiat asuba de unu parastàgiu e non fiat ancora acabau: fiat chena de buca e de pabaristas. Su Grillu fiat pesau asuba de su nasu de su buratinu po ddu castiai mellus, ma intendedeu boxis, fiat curtu a si cuai: calincunu fiat arribbendi!

In s'aposentu fiat intrau Gepetu impari a Fìgaru, unu pisiteddu bellixeddu. “Ajo a trabballai!” iat nau su maistu de linna, apustis iat pigau su pinzellu e iat acabau sa cara de su buratinu; in su mentris Fìgaru e sa piscixedda Cleo ddu castiànt cun atentu.

“E moi tengu puru unu nòmini bellu po tui: Opineddu!” iat nau Gepetu apustis de ai acabbau de pintai sa cara de su buratinu. Fiat aici prexau de su trabballu cosa sua ca iat fintzas fatu una festa piticheddedda. Iat carriau una scatulledda musicali e fadiat baddai Opineddu aintru de s'aposentu a tempus de mènica.

Spaciada sa mènica, is arrollògius si fiant postus a sonai totus impari. Fiat tardu e Gepetu fiat andau a si nci crocai. Ma primu de si dromì, iat castiau a foras de sa fantana

Ufitziu de sa lìngua sarda de Arbus - PROGETU IMOI ETOTU – ANNU 2024

Laboratòriu in lìngua sarda poi is classis de sa scola primària 3 A e 3 B

Operadora: Santina Alice Sardu

aberta e iat biu in su celu su steddu de is disìgius. “Apu pediu chi Opineddu siat unu pipiu beru!” iat nau a Fìgaru. Apustis si nci fiat dromiu. In cussu momentu s’aposentu si fiat prenu de luxi e fiat arribbada sa Jana asula.

“Ojamomia! Una Jana!” iat nau totu spantau su Grillu chi chistionat. Sa Jana Asula iat castiau Gepetu dromendi e iat nau muscendu: “Gepetu bonu, as donau prèxiu mannu a is àterus e ti minescis chi su bisu tuu siat beru!” Apustis iat castiau Opineddu, iat mòviu sa bachita màgica, iat nau unu incantèsimu e... totuinduna su puponi fiat biu.

“Mi potzu movi, sciu chistionai!” iat nau Opineddu a tzèrrius, totu spantau. “Chi fais a bonu e chi ses coragiosu, in su benidori as a essi unu pipiu beru!” dd’iat promìtiu sa jana. “Ma primu depis comprendi ita est su beni e ita est su mali”. “E cumenti fatzu?” iat preguntau Opineddu. “Ti dd’at a nai sa coscièntzia cosa tua” dd’iat torrau sa Jana. E su Grillu chi chistionat iat aciuntu: “Sa coscièntzia est cussa boxixedda chi tenis aintru, chi sa genti no ascurtat gai mai.”

“T’iat a praxi a essi sa coscièntzia de Opineddu?” iat domandau sa Jana. Su Grillu fiat diventau arrùbiu po su prèxiu. Intzandus sa Jana dd’iat acostau sa bachita màgica; luegus fiat bessida una luxi forti forti e su bistiri bèciu de su Grillu fiat diventau nou e bellu. Sa Jana dd’iat mudau in sa coscièntzia de Opineddu. “Depis ascurtai sèmpiri sa boxi de sa coscièntzia cosa tua!” iat nau a su puponi, e fiat sparèssia.

Prexau che puxi, Opineddu iat inghitzau a baddai in s’aposentu. Su sonu iat sciumbullau Gepetu, chi, biendu su puponi chi si moviat a solu e sciat chistionai, gai gai, non podiat crei a is ogus suus. “Castia, o Fìgaru, est biu!” iat nau totu prexau, imprassendi Opineddu.

Su mangianu apustis Gepetu iat acumpangiau Opineddu in s’oru de sa jenna. Sa bia fiat prena de pipius arriendi cun is lìburus asuta de su bratzu. Su puponi iat pigau su lìburu suu e una mela arrùbia bella, iat saludau e fiat andau a scola.

In su mentris in sa bidda, girant duus personàgius strambecus: su Pisitu e su Margiani. Iant biu pagora su spetàculu de puponis de Papafogu, candu su Margiani iat biu Opineddu: “Castia!” iat nau a su Pisitu. Unu puponi biu, chena de filus! E luegus ddi fiat benida a conca sa bidea de bendi Opineddu a Papafogu po guadangiai unu niasi de dinai.

Opineddu fiat currendi cara de sa scola candu su Margiani dd’iat fatu imbrunchiai in su matzucu suu. Agiudendiddu a si ndi pesai, su Pisitu e su Margiani iant domandau a Opineddu audi fiat andendi aici de pressi. “Seu andendi a scola!” iat nau Opineddu. “Ma tui non ddu sciis chi nci funt maneras prus facilis po tenni sa fortuna!” iat nau su Margiani. “Seu chistionendi de su Teatru, piciocheddu miu! Luxis, mùsica, genti chi tzacat is manus, spàssiu!”. Opineddu ascurtàt a buca aberta.

In su mentris, su Grillu circàt de sorigai s’amigu suu. “Arratza de cuscièntzia seu, apu fatu a tardu gai de sa primu dii. Oja, ge no at a ai cumbinai calincuna cosa in su mentris chi fiat andendu a scola?” fiat pentzendi a solu totu preocupau. Totuinduna iat biu Opineddu andendi cun cussus duus. “Ohhhh, ohhhh, abini ses andendi? Abeta, Abeta unu pagheddu!” iat circau in dònnia manera de cunvinci a Opineddu a torrai a scolla. Ma Opineddu iat prefèriu a si ndi andai cun su Pisitu e su Margiani.

Su Margiani sighiat a cunfundì a Opineddu cun unu niasi de chistionis. “Ah, segundu mei tui ses pròpiu unu atori beru!”. Opineddu fiat totu spantau poi is promissas de cussu duus imbrollionis, e ddus iat sighiu cun gana, scaresciendi-sì de totu, de sa scola e de sa coscièntzia cosa sua.

Candu iat biu a Opineddu, Papafogu fiat prexau meda, e iat nau a su pùblicu: “Labai s’ùnicu Puponi in su Mundu chi sciit baddai e cantai chena de s’agiudu de is filus: Opineddu!” In su palcu si fiant allutas is luxis e Opineddu iat inghitza a cantai e baddai.

Su spetàculu fiat andau beni meda! Su pùblicu iat ghetau unu sciacu mannu de dinai. Papafogu fiat prexau e po fintzas su Grillu, chi iat biu totu, nc’iat torrau a pentzai asuba

de su caminu de atori de Opineddu: “Mmmh, fortzis mi seu sballiau, est bravu diaderus!”

Apustis de su spetàculu, Opineddu pentzàt de si ndi torrai a domu. Ma Papafogu no fiat de acòrdiu! “A domu? Cosa de non crei! Tui ses cosa mia”. Si fiat postu a arriri e dd’iat serrau aintru de una gabbia in sa carrotza sua. Duncas iat inghitza a ghiai po lompi a àteras biddas noas. Opineddu fiat diaderus disisperau.

Su Grillu, candu iat biu sa carrotza partendi, dd’iat sorigau e fiat arrennèsciu a intrai aintru de unu stampu. Iat biu Opineddu tristu tristu aintru de sa gabbia. “Ita ddoi fais ingunis aintru?” E Opineddu, prexau de ddu biri, dd’iat contau totu.

In su mentris Gepetu, chi iat abetau totu sa dii a Opineddu, preocupau meda fiat bessiu a ddu circai. In sa carrotza su Grillu fiat circhendu de aberri sa gabbiaanca fiat Opineddu. Iat provau e torrau a provai, in ònnia manera. Ma non nci fiat arrennèsciu! Non sciant pròpiu a commenti fai. Ita dannu mannu!

Totuinduna, fiat arribbada sa Jana. “Poita non ses andau a scola?” iat preguntau a Opineddu. Su puponi iat contau unu niasi de faulas e su nasu suu iat inghitza a cresci sèmpiri de prus. Sa Jana fiat arrennegada po is faulas de Opineddu. Opineddu, prenu de bregùngia dd’iat nau: “Perdonami-dda, mi dispraxit meda!”. Duncas sa Jana iat abertu sa gabbia, fadendi una magia, e luegus fiat sparèssia. Opineddu, lìberu, si fiat fiu de pressi impari a su Grillu.

In su mentris, su Pisitu e su Margiani in unu tzilleri de sa bidda, fiant spendendi totu su dinai chi iant guadangiau bendendi Opineddu. In una mesa fiat sètziu su Postillioni, un’òmini mau chi pinnicàt is pipius po ddus arregolli in sa Bidda de is Giogus. Su Postilloni iat domandau agiudu a su Margiani e a su Pisitu, e issus iant decidiu de dd’agiudai po guadangiai àteru dinai.

Bessius de su tzilleri, su Pisitu e su Margiani iant atobiau torra a Opineddu, chi fiat torrendu a domu anca de Gepetu. In su mentris chi su Pisitu dd'apoderàt cun su matzucu, su Margiani dd'iat domandau comentì andànt is spetaculus, e Opineddu iat nau seguru ca non boliat prus fai s'atori, e iat contau ita fiat acuntèssiu cun Papafogu. “Oh, depis essi dispraxu meda!” iat nau su Margiani.

Su Margiani, chi fiat abbistu meda, iat nau intzandus chi fiat unu dotori e iat bisitau a Opineddu. Su Pisitu fingiat de scriri in unu cuadernu. “Oiamomia, tui ses malàdiu, malàdiu meda. Nc'at sceti una manera po sanai: andai a ti pasiai in sa Bidda de is Giogus” e dd'iat contau de custu logu stravanau anca ddoi aiat sèmpiri festa.

“Ajo, andaus! Sa corriera partit a mesunoti! E dd'iant pigau po is bratzus. In cussu momentu fiat arribbau su Grillu chi chistionat, ca ddus iat sighius tzerriendi: “Oh, Opineddu, torra acou, ajo”. Ma Opineddu, alluniau de totus cussas chistionis, no iat ascurtau sa coscièntzia cosa sua, un'àtera borta.

Cussa noti Opineddu fiat partiu po sa Bidda de is Giogus asuba de unu carru tirau de molentis, chi su Pustillioni arropàt chena de piedadi. Po fortuna manna, su Grillu chi chistionat fiat arrennèsciu a si cuai in su carru. In su biàgiu, su Grillu si fiat fatu un'amigu nou, Lucìgnolo, unu pipiu malu chi dd'iat contau de sa Bidda de is Giogus. “Est unu logu bellu bellu! Non tocat a andai a scola, non ddoi at maistus, e est prenu de drucis, ndi podis papai cantu ndi bolis!”

Arribbaus in sa Bidda de is giogus, fiat diaderus su logu prus bellu chi si podeis pentzai. Candu Opineddu fiat intrau cun is àterus, una boxi tzerriàt “Ajo, pipius, ajo, benei a innoi! Est totu gratis!” Opineddu non nci podiat crei: in cussa Bidda incantada podiat fai totu su chi bolliat.

Opineddu, cun una truta in manu e unu gelau in s'àtera, iat atobiau a Lucìgnolo chi fiat alluendu-si-dda unu sigarru. Impari iant decìdiu de bisitai cussu logu nou e spassosu, prenu de coloris e de arrisus. Iant passau totu sa dii gioghendi.

Is pipius si fiant spassiaus fintzas a sa noti, candu su Postillioni iat serrau totus is gennas de sa Bidda de is Giogus. Totus is pipius fiant prisoneris.

Su Grillu chi chistionat fiat girendi in sa Bidda de is Giogus circhendi a Opineddu, candu si fiat acatau chi sa bidda fiat sbuida, e non ddoi aiat prus nemus. Su Grillu tzerriàt: “Opineddu! Opineddu!” ma nisciunu arrespondiat.

A sa fini, su Grillu iat agatau a Opineddu, chi fiat gioghendi a biliardu cun s'amigu nou, Lucìgnolo. “Opineddu, ita nci fais innoi? Aici pentzas de essi unu pipiu beru? Imoi torras a domu cun mimi, ajo, andaus!”. Lucìgnolo, intendendi custus fueddus, si fiat postu a arriri. Su Grillu intzandus si fiat arrennegau, e candu iat cumprèndiu chi Opineddu boliat abarrai cun s'amigu suu, si ndi fiat andau, totu dispraxu.

Candu si ndi fiat andendi, su Grillu iat scrobetu chi a de noti is pipius mudànt in molenteddus, e chi su Postillioni, cuss'òmini malu, ddus bendiat po guadangiai dinai. Intzandus su Grillu fiat torrau acou po ddu nai a Opineddu, e iat biu chi Lucìgnolo fiat giae unu molenti, totu spramau, e a Opineddu ddi fiant bessidas is origas e sa cou de molenti.

“Ajo Opineddu, curri, andau-si-nci, prestu!” tzerriàt currendi impari a su puponi faci a s'ùnica manera po si nci andai: su mari. Si fiant scavaus in mari e iant inghitza a nadai, po si nci torrai a domu de Gepetu.

Arribbaus a domu iant tzacau sa genna, iant tzerria, ma nisciunu arrespundiat. “Bai e circa ita dd'at a essi acuntèssiu!” iat nau Opineddu disisperau. In cussu momentu una columba iat ghetau una litera, e Grillu si fiat postu a dda ligi. “Gepetu fiat circhendi-tidda, e dd'at papau una balena! Ma est biu ancora, s'agat aintru de sa brenti de sa balena, in fundu de mari!”. Duncas Gepetu teniat abbisòngiu de agiudu: Opineddu, chentza de nci pentzai unu minutu, iat decìdiu de curri a ddu sarvai.

Opineddu si fiat acapiau una pedra a sa cou, po calai de pressi in bàsciu asuta de àcua. Su Grillu chi chistionat non ddu podiat lassai a solu, e duncas fiat acabussau impari a issu. Asuta de àcua, iant domandau agiudu a is piscis. Ma totus is chi biviant in mari, candu intendiant chistionai de sa balena, si fuiant disisperaus.

Gepetu, prisoneri aintru de sa brenti manna manna de sa balena impari a Fìgaru e Cleo, abarràt sètziu asuba de una barca bècia circhendi de piscai calincuna cosa. Ma non ddoi aiat mancu unu pisci! “Seus morrendu de fàmini, no eus a pòdiri abarrai aici po tempus meda!” iat nau tristu.

Infinis, Opineddu e Grillu iant agatau sa balena, chi fiat sighendi is piscis. Ge fiat pagu manna! Ita atzìchidu mannu!

Sa balena iat abertu sa buca e si fiat papada is piscis e Opineddu. Apustis iat serrau sa buca, e su Grillu fiat abarrai in foras e fiat intrau in una ampudda de imbirdu.

Gepetu, circhendi de piscai is piscis, iat aciapau a su fillu suu: “Fillu miu, ita bellu a ti torrai a biri” iat nau imprassendi-ddu.

Opineddu non biat s'ora de si nci fui de cussa brenti lègia. Ma Gepetu dd'iat nau: “aberrit sa buca sceti po papai, apustis dda torrat a serrai. Is cosas podint sceti intrai, non podint bessiri. Non si nci podeus andai”. Ma a Opineddu ddi fiat benida a conca un'àtera bidea: “Dda fadeus sturridai!” e iant allutu su fogu cun totu sa linna chi iant agatau.

Sa balena iat sturridau e Opineddu, Gepetu, Fìgaru e Cleo ndi fiant bessius a foras.

Sa balena perou si fiat arrennegada meda, e si fiat posta a ddus sighiri, ma Gepetu e Opineddu fiant arrennèscius a si fui.

Gepetu, perou, non sciat annadai, e fiat calau asuta de àcua. Opineddu dd'iat pinnicau e ddu portàt faci a sa terra frima. Ma sa balena sighiat a ddus sighiri, ca si ddus boliat papai.

In su mentris chi sa balena fiat circa de ddus sorigai, Opineddu fiat arrennèsciu a si ponni in mesu de is arrocas. Sa balena nci fiat tzacada asuba, e iat mòviu unu niaxi de àcua. S'àcua forti iat scavau totus in sa spiàgia. Fiant sarvus.

Gepetu si ndi fiat scidau in sa spiàgia, e iat agatau Cleo, Figaru e su Grillu. Ma Opineddu fiat in s'àcua, e non si moviat prus!

Gepetu dd'iat pigau, portau a domu e postu in su letu. E prangiat, e prangiat. Candu, totuinduna, fiat bessida una luxi asuba de Opineddu! Fiat sa Jana Asula! “Opineddu, sciumbulla-ti-ndi, ajo!” e su puponi iat abertu is ogus e..

“Seu unu pipiu beru, seu unu pipiu beru!” tzerriàt Opineddu, chi iat fatu a bonu, iat tentu coràgiu mannu e iat sarvau a Gepetu. Si fiat minèsciu su prèmiu de sa Jana Asula. Totus si fiant postus a fai festa, baddendi e cantendi, prexaus che puxis.